

LE POESIE "ROSA" DI ELVIRA ZOCCATELLI

Villafranca di Verona

PAROLE SENSÀ VEL

L'è massa serio 'sto vecio castel
ghe manca proprio l'antico slusor,
provemo verzar chel fredo cancel
portemoghe drento un po' de calor.
E se ghe impissemo un fogo slusente
che'l riessa far ciaro fin su nel cel,
che'l possa scaldarghe el cor a la gente
portando notissie senza più vel.
Vardar le Toresine colorarse,
sentir scaldarse i muri pian pianin
le merladure rosse imboressarse,
fin che el pensier se sfanta el roseghin.
E se no riva el vento el fogo el v'è
a colorar de Rosa la Cità.

San Giovanni Lupatoto

LA TORRE IN ROSA

Stasera da la Tor
no sbrissia zo aqua
che bagna, che core, che v'è
ma solo i segreti
che le done le g'ha.
Al scuro, nel silenzio
te senti besbeiar
speremo, cissà
doman se vedarà.
Ma quando la Tor
la se farà Rosa
e la strada se illuminarà
in noialtre cambiarà calcosa
deventaremo aqua, aqua Rosa
aqua che core, che lava tutti i "cissà"
e che gnissun mai fermarà.



Colognola ai Colli

LA SCALINATA ROSA

Rugola zo da sti scalini
una ventada de aria Rosa
e noialtre, come butini,
la ciapemo ferme in posa.
L'è n'arieta calda calda
la ne cambia un pò l'umor
l'è un tepor che ne riscalda
che a la vita dà vigor.
Così torna la speranza:
l'è cambiado de color
se un scalin l'è za calcosa
par noialtre superar
Scalinada tuta Rosa
l'è lì pronta da scalar.

Verona

L'ARENA IN ROSA

I l'a vestia de rosa,
l'Arena, stasera,
dobada de lustrini
l'è tuta un slusegar,
par che la rida
l'Arena, stasera
e'l so sorriso caldo
te'l senti ne l'aria,
l'è 'n augurio de speranza
che se alsa verso 'l ciel,
dopo, ghe pensarà el vento
portarlo pa 'el mondo.

San Giovanni Ilarione

SAN GIOVANNI ILARIONE

Lava 'l Basalto, l'Alpon cantarelando,
tegnudo d'ocio, sempre dal Castel,
la vigna se fa strada fremegando
par indorar i graspi pa'l Durel.
Resenta i to pensieri tristi e scuri
drento 'sta aqua ciara che discore,
che strapegando sassi neri e duri,
la conta de speranse che no' more.
Quando el Castel se impissarà de Rosa,
come che'l fusse un siresar in fior,
gh'è el Calvarin là sora che'l sgolosa,
par caessar la val con tanto amor.
Te stigarà la voia de sperar,
ne la vita, no ghe né mai bastansa,
bisòn 'ndar 'vanti senza mai molar
tegnendo streto el fil de la speranza.
I graspi i è de oro, sora la vigna,
intorno gh'è profumo de vendemia,
stasera, solo Pace par che vegna...
e...domatina, 'ndemo incontro al Sol.